

欽定舊唐書

卷一百七十二之一百七十八

欽定四庫全書

卷一百一十五

舊唐書卷一百七十二

後晉司空同中書門下平章事劉昫撰

列傳第一百二十二

令狐楚

弟定子緒綢繡子滴

牛僧孺

子蔚蒙蔚子徽

蕭俛弟傑俛從弟做做子虞

李石

弟福

令狐楚字殷士自言國初十八學士德棻之裔祖崇亮綿州昌明縣令父承簡太原府功曹家世儒素楚兒童時已學屬文弱冠應進士貞元七年登第桂管觀察使王拱愛其才欲以禮辟召懼楚不從乃先聞奏而後致聘楚以父掾太原有庭闈之戀又感拱厚意登第後徑往桂林謝拱不預宴遊乞歸奉養卽還太原人皆義之李說嚴綬鄭儋相繼鎮太原高其行義皆辟爲從事自掌書記至節度判官歷殿中侍御史楚才思俊麗德宗好文每太原奏至能辨楚之所爲頗稱之鄭儋在鎮暴卒不及處分後事軍中喧譁將有急變中夜十數騎持刃迫楚至軍門諸將環之令草遺表楚在白刃之中搦管卽成讀示三軍無不感泣軍情乃安自是聲名益重丁父憂以孝聞免喪徵拜右拾遺改太常博士禮部員外郎母憂去官服闋以刑部員外郎徵轉職方員外郎知制誥楚與皇甫鏊蕭俛同年登進士第元和九年鏊初以財賦得罪薦俛楚俱入翰林充學士遷職方郎中中書舍人皆居內職時用兵淮西言事者以師久無功宜宥賊

罷兵唯裴度與憲宗志在殄寇十二年夏度自宰相兼彰義軍節度淮西招撫宣慰處置使宰相李逢吉與度不協與楚相善楚草度淮西招撫使制不合度旨度請改制內三數句語憲宗方責度用兵乃罷逢吉相任亦罷楚內職守中書舍人元和十三年四月出爲華州刺史其年十月皇甫鏖作相其月以楚爲河陽懷節度使十四年四月裴度出鎮太原七月皇甫鏖薦楚入朝自朝議郎授朝議大夫中書侍郎同平章事與鏖同處台衡深承顧待十五年正月憲宗崩詔楚爲山陵使仍撰哀冊文時天下怒皇甫鏖之奸邪穆宗卽位之四日羣臣素服班於月華門外宣詔貶鏖將殺之會蕭俛作相託中官救解方貶崖州物議以楚因鏖作相而逐裴度羣情共怒以蕭俛之故無敢措言其年六月山陵畢會有告楚親吏贓汙事發出爲宣歙觀察使楚充奉山陵時親吏韋正牧奉天令于羣翰林陰陽官等同隱官錢不給工徒價錢移爲羨餘十五萬貫上獻怨訴盈路正牧等下獄伏罪皆誅楚再貶衡州刺史時元稹初得幸爲學士素惡楚與鏖膠固希寵稹草楚衡州制略曰楚早以文藝得踐班資憲宗念才擢居禁近異端斯害獨見不明密臆討伐之謀潛附奸邪之黨因緣地進取多門遂忝台階實妨賢路楚深恨稹長慶元年四月量移鄧州刺史遷太子賓客分司東都二年十一月授陝州大都督府長史兼御史大夫陝虢觀察使制下旬日諫官論奏言楚所犯非輕未合居廉察之任上知之遽令追制時楚已至陝州視事一日矣復授

賓客歸東都時李逢吉作相極力援楚以李紳在禁密沮之未能擅柄敬宗卽位逢吉逐李紳尋用楚爲河南尹兼御史大夫其年九月檢校禮部尙書汴州刺史宣武軍節度汴宋亳觀察等使汴軍素驕累逐主帥前後韓弘兄弟率以峻法繩之人皆偷生未能革志楚長於撫理前鎮河陽代烏重胤移鎮滄州以河陽軍三千人爲牙卒咸不願從中路叛歸又不敢歸州聚於境上楚初赴任聞之乃疾驅赴懷州潰卒亦至楚單騎喻之咸令橐弓解甲用爲前驅卒不敢亂及莅汴州解其酷法以仁惠爲治去其太甚軍民咸悅翕然從化後竟爲善地汴帥前例始至率以錢二百萬實其私藏楚獨不取以其羨財治廩舍數百間太和二年九月徵爲戶部尙書三年三月檢校兵部尙書東都留守東畿汝都防禦使其年十一月進位檢校右僕射鄆州刺史天平軍節度鄆曹濮觀察等使奏故東平縣爲天平縣屬歲旱儉人至相食楚均富贍貧而無流亡者六年二月改太原尹北都留守河東節度等使楚久在并州練其風俗因人所利而利之雖屬歲旱人無轉徙楚始自書生隨計成名皆在太原實如故里及是秉旄作鎮邑老歡迎楚綏撫有方軍民胥悅七年六月入爲吏部尙書仍檢校右僕射故事檢校高官者便從其班楚以正官三品不宜從二品之列請從本班優詔嘉之九年六月轉太常卿十月尙書左僕射進封彭陽郡開國公十一月李訓兆亂京師大擾訓亂之夜文宗召左僕射鄭覃與楚宿于禁中商量制勅上皆欲用爲宰相

楚以王涯賈餽冤死敘其罪狀浮泛仇士良等不悅故輔弼之命移於李石乃以本官領鹽鐵轉運等使先是鄭注上封置榷茶使額鹽鐵使兼領之楚奏罷之曰伏以江淮數年已來水旱疾疫凋傷頗甚愁歎未平今夏及秋稍校豐稔方須惠卹各使安存昨者忽奏榷茶實爲蠹政蓋是王涯破滅將至怨怒合歸豈有令百姓移茶樹於官場中栽植摘茶葉於官場中造作有同兒戲不近人情方在恩權孰敢沮議朝班相顧而失色道路以目而吞聲今宗社降靈奸兇盡戮聖明垂祐黎庶合安徽臣蒙恩兼領使務官銜之內猶帶此名俯仰若驚夙宵知懼伏乞特廻聖聽下鑒愚誠速委宰臣除此使額緣軍國之用或闕山澤之利有遺許臣條疏續具聞奏探造將及妨廢爲虞前月二十一日內殿奏對之次鄭覃與同陳論訖伏望聖慈早賜處分一依舊法不用新條唯納榷之時須節級加價商人轉賣必校稍貴卽是錢出萬國利歸有司旣不害茶商又不擾茶戶上以彰陛下愛人之德下以竭微臣憂國之心遠近傳聞必當感悅從之先是元和十年出內庫弓箭陌刀賜左右街使充宰相入朝以爲翼衛及建福門而止至是因訓注之亂悉罷之楚又奏諸道新授方鎮節度使等具帑抹帶器仗就尙書省兵部參辭伏以軍國異容古今定制若不由舊斯爲改常未聞省閤之門忽內弓刀之器鄭注外蒙恩寵內蓄兇狂首創奸謀將興亂兆致王璠郭行餘之輩敢驅將吏直詣闕庭震驚乘輿騷動京國血濺朝路尸僵禁街史冊所書人神共憤

既往不咎其源尙開前件事宜伏乞速令停罷如須叅謝卽具公服從之又奏請罷修曲江亭絹一萬三千七百匹廻修尙書省從之開成元年上巳賜百寮曲江亭宴楚以新誅大臣不宜賞晏獨稱疾不赴論者美之以權在內官累上疏乞解使務其年四月檢校左僕射興元尹充山南西道節度使二年十一月卒于鎮年七十二冊贈司空諡曰文楚風儀嚴重若不可犯然寬厚有禮門無雜賓嘗與從事晏語方酣有非類偶至立命徹席毅然色變累居重任貞操如初未終前三日猶吟詠自若疾甚諸子進藥未嘗入口曰修短之期分以定矣何須此物前一日召從事李商隱曰吾氣魄已殫情思俱盡然所懷未已強欲自寫聞天恐辭語乖舛子當助我成之卽秉筆自書曰臣永惟際會受國深恩以祖以父皆蒙褒贈有弟有子並列班行全腰領以從先人委體魄而事先帝此不自達誠爲甚愚但以永去泉扃長辭雲隱更陳尸諫猶進瞽言雖號叫而不能豈誠明之敢忘今陛下春秋鼎盛寶海鏡清是修教化之初當復理平之始然自前年夏秋已來貶譴者至多誅戮者不少望普加鴻造稍霽皇威歿者昭洗以雲雷存者霑濡以雨露使五穀嘉熟兆人安康納臣將盡之苦言慰臣永摯之幽魄書訖謂其子緒緇曰吾生無益於人勿請諡號葬日勿請鼓吹唯以布車一乘餘勿加飾銘誌但志宗門秉筆者無擇高位當歿之夕有大星貫於寢室之上其光燭廷楚端坐與家人告訣言已而終嗣子奉行遺旨詔曰生爲名臣歿有理命終始之

分可謂兩全國薄哀榮之末節難違往意誅謚國家之大典須守彝章鹵簿宜停易名須準舊例後綱貴
累贈至太尉有文集一百卷行於時所撰憲宗哀冊文辭情典鬱爲文士所重楚弟定字履常元和十一
年進士及第累辟使府大和九年累遷至職方員外郎弘文館直學士檢校右散騎常侍桂州刺史桂管
都防禦觀察等使卒贈禮部尚書緒以蔭授官歷隨壽汝三郡刺史在汝州日有能政郡人請立碑頌德
緒以弟綱在輔弼上言曰臣先父元和中特承恩顧弟綱官不因人出自宸衷臣伏觀詔書以臣刺汝州
日粗立政勞吏民求立碑頌尋乞追罷臣任隨州日郡人乞留得上下考及轉河南少尹加金紫此名已
聞於日下不必更立碑頌乞賜寢停宣宗嘉其意從之綱字子直太和四年登進士第釋褐弘文館校書
郎開成初爲左拾遺二年丁父喪服闋授本官尋改左補闕史館修撰累遷庫部戶部員外郎會昌五年
出爲湖州刺史大中二年召拜考功郎中等知制誥其年召入充翰林學士三年拜中書舍人襲封彭陽
男食邑三百戶尋拜御史中丞四年轉戶部侍郎判本司事其年改兵部侍郎同中書門下平章事綱以
舊事帶尚書省官合先省上上日同列集於少府監時白敏中崔龜從曾爲太常博士至相位欲襲其舊
署乃改集於太常禮院龜從手筆志其事於壁綱輔政十年累官至吏部尚書右僕射涼國公食邑二千
戶三十年罷相檢校司空同中書門下平章事河中尹河中晉絳等節度使咸通二年改汴州刺史宣武

軍節度使三年冬遷揚州大都督府長史淮南節度副大使知節度事累加開府儀同三司檢校司徒進食邑至三千戶九年徐州戍兵龐勛自桂州擅還七月至浙西沿江自白沙入澗河剽奪舟船而進勛聞勛至遣使慰撫供給芻米都押衙李湘白勛曰徐兵擅還必無好意雖無詔命除討權變制在藩方昨其黨來投言其數不踰二千而虛張舟航旗幟恐人見其實涉境已來心頗憂懼計其水路須出高郵縣界河岸斗峻而水深狹若出奇兵邀之俾荻船縱火於前勁兵奮擊於後敗走必矣若不於此誅勛俟濟淮泗合徐人負怨之徒不下十萬則禍亂非細也勛性懦緩又以不奉詔命謂湘曰長淮已南他不爲暴從他過去餘非吾事也其年冬龐勛殺崔彥曾據徐州聚衆六七萬徐無兵食乃分遣賊帥攻剽淮南諸郡滁和楚壽繼陷穀食既盡淮南之民多爲賊所噉時兩淮郡縣多陷唯杜愔守泗州賊攻之經年不能下初詔緇爲徐州南面招討使賊攻泗州急緇令李湘將兵五千人援之賊聞湘來援遣人致書于緇辭情遜順言朝廷累有詔赦宥但抗拒者三兩人耳旦夕圖去之卽束身請命願相公保任之緇卽奏聞請賜勛節鉞仍誡李湘但戍淮口賊已招降不得立異緇是湘軍解甲安寢去警徹備日與賊軍相對歡笑交言一日賊軍乘間步騎徑入湘壘淮卒五千人皆被生繫送徐州爲賊蒸而食之湘與監軍郭厚本爲龐勛斷手足以徇於康承訓軍時浙西杜審權發軍千人與李湘約會兵大將翟行約勇敢知名浙軍未至

而湘軍敗賊乃分兵立淮南旗幟爲交鬪之狀行約軍望見急趨之千人並爲賊所縛送徐州縋旣喪師朝廷以左衛大將軍徐州西南面招討使馬舉代縋爲淮南節度使十二年八月授檢校司徒太子太保分司東都十三年以本官爲鳳翔尹鳳翔隴節度使進封趙國公食邑三千戶卒子瀹渙渢瀹少舉進士以父在內職而止及縋輔政十年瀹以鄭顯之親驕縱不法日事遊宴貨賄盈門中外爲之側目以縋黨援方盛無敢措言及懿宗卽位訟者不一故縋罷權軸旣至河中上言曰臣男瀹爰自孩提便從師訓至於詞藝頗及輩流會昌二年臣任戶部員外郎時已令應舉至大中二年猶未成名臣自湖州刺史蒙先帝擢授考功郎中知制誥尋充學士繼叨渥澤遂忝樞衡事體有妨因令罷舉自當廢絕一十九年每遣退藏更令勸勵臣以祿位逾分齒髮已衰男瀹年過長成未霑一第犬馬私愛實切憫傷臣二三年來頻乞罷免每年取得文解意待纔離中書便令赴舉昨蒙恩制寵以近藩伏緣已遍禮部試期便令就試至於與奪出自主司臣固不敢撓其衡柄臣初離機務合具上聞昨延英奉辭本擬面奏伏以戀恩方切陳誠至難伏冀宸慈察臣丹懇詔令就試是歲中書舍人裴坦權知貢舉登第者三十人有鄭義者故戶部尚書澥之孫裴弘餘故相休之子魏管故相扶之子及瀹皆名臣子弟言無實才諫議大夫崔瓊上疏論之曰令狐瀹昨以父居相位權在一門求請者詭黨風趨妄動者羣邪雲集每歲貢闈登第在朝清列除

官事望雖出於綢取捨全由於漚喧然如市旁若無人權勳寶中勢傾天下及綢罷相作鎮之日便令漚納卷貢闈豈可以父在樞衡獨撓文柄請下御史臺按問文解日月者奏疏不下漚既及第釋褐長安尉集賢校理咸通二年遷右拾遺史館修撰制出左拾遺劉蛻起居郎張雲客上疏極論漚云恃父秉權恣受貨賂取李琢錢除琢安南都護遂致蠻陷交州張雲言大中十年綢以諫議大夫豆盧緒刑部郎中李鄴爲夔王已下侍讀欲立夔王爲東宮欲亂先朝子弟之序漚內倚鄴顯人誰敢言時綢在淮南累表自雪懿宗重傷大臣意貶雲爲興元少尹蛻爲華陰令改漚詹事府司直漚爲衆所非宦名不達渙輒俱登進士第渙位至中書舍人定子緘緘子澄湘澄亦以進士登第累辟使府

牛僧孺字思黯隋僕射奇章公弘之後祖紹父幼簡官卑僧孺進士擢登第賢良方正制科釋褐伊闕尉遷監察御史轉殿中歷禮部員外郎元和中改都官知臺雜尋換考功員外郎充集賢直學士穆宗卽位以庫部郎中知制誥其年十一月改御史中丞以州府刑獄淹滯人多冤抑僧孺條疏奏請按劾相繼中外肅然長慶元年宿州刺史李直臣坐贓當死直臣賂中貴人爲之申理僧孺堅執不回穆宗面喻之曰直臣事雖僭失然此人有經度才可委之邊任朕欲貸其法僧孺對曰凡人不才止於持祿取容耳帝王立法束縛奸雄正爲才多者祿山朱泚以才過人濁亂天下況直臣小才又何屈法哉上嘉其守法面賜

金紫二年正月拜戶部侍郎三年三月以本官同平章事初韓弘入朝以宣武舊事人多流言其子公武以家財厚賂權幸及多言者班列之中悉受其遺俄而父子俱卒孤孫幼小穆宗恐爲厯養竊盜乃命中使至其家閱其宅簿以付家老而簿上具有納賂之所唯於僧孺官側朱書曰某月日送牛侍郎物若干不受却付訖穆宗按簿甚悅居無何議命相帝首可僧孺之名敬宗卽位加中書侍郎銀青光祿大夫封奇章子邑五百戶十二月加金紫階進封郡公集賢殿大學士監修國史寶曆中朝廷政事出於邪倖大臣朋比僧孺不奈羣小拜章求罷者數四帝曰俟予郊禮畢放卿及穆宗祔廟郊報後又拜章陳退乃於鄂州置武昌軍額以僧孺檢校禮部尙書同中書門下平章事鄂州刺史武昌軍節度鄂岳蘄黃觀察等使江夏城風土散惡難立垣墉每年加板築賦菁莪以覆之吏緣爲奸蠹弊綿歲僧孺至計莠莠板築之費歲十餘萬卽賦之以墁以當苦築之價凡五年墉皆甃葺蠹弊永除屬郡沔州與鄂隔江相對虛張吏員乃奏廢之以其所管漢陽沔川兩縣隸鄂州文宗卽位就加檢校吏部尙書凡鎮江夏五年大和三年李宗閔輔政屢薦僧孺有才不宜居外四年正月召還守兵部尙書同平章事五年正月幽州軍亂逐其帥李載義文宗以載義輸忠於國遽聞失帥駭然急召宰臣謂之曰范陽之變奈何僧孺對曰此不足煩聖慮且范陽得失不繫國家休戚自安史已來翻覆如此前時劉總以土地歸國朝廷耗費百萬終不得

范陽尺帛斗粟入于天府尋復爲梗至今志誠亦由前載義也但因而撫之俾扞奚契丹不令入寇朝廷所賴也假以節旄必自陳力不足以逆順治之帝曰吾初不詳思卿言是也卽日命中使宣慰尋加門下侍郎弘文館大學士六年吐蕃遣使論董勃義入朝修好俄而西川節度李德裕奏吐蕃維州守將悉怛謀以城降德裕又上利害云若以生羌三十出戎不意燒十三橋擣戎之腹心可以得志矣上惑其事下尙書省議衆狀請如德裕之策僧孺奏曰此議非也吐蕃疆土四面萬里失一維州無損其勢況論董勃義纔還劉元鼎未到比來修好約罷戍兵中國禦戎守信爲上應敵次之今一朝失信戎醜得以爲詞聞贊普牧馬茹川俯於秦隴若東襲隴坂徑走回中不三日抵咸陽橋而發兵枝梧駭動京國事或及此雖得百維州亦何補也上曰然遂詔西川不內維州降將僧孺素與德裕仇怨雖議邊公體而怙德裕者以僧孺害其功謗論沸然帝亦以爲不直其年十二月檢校左僕射兼平章事揚州大都督府長史淮南節度副大使知節度事中尉王守澄用事多納纖人竊議時政禁中事密莫知其說一日延英對宰相文宗曰天下何由太平卿等有意於此乎僧孺奏曰臣等待罪輔弼無能康濟然臣思太平亦無象今四夷不至交侵百姓不至流散上無淫虐下無怨讟私室無强家公議無壅滯雖未及至理亦謂小康陛下若別求太平非臣等所及旣退至中書謂同列曰吾輩爲宰相天子責成如是安可久處茲地耶旬日間三

上章請退不許會德裕黨盛垂將入朝僧孺故得請上既受左右邪說急於太平奸人伺其銳意故訓誥見用數年之間幾危宗社而僧孺進退以道議者稱之開成初摺紳道喪闕寺弄權僧孺嫌處重藩求歸散地累拜章不允凡在淮甸六年開成二年五月加檢校司空食邑二千戶判東都尚書省事東都留守東畿汝都防禦使僧孺識量弘遠心居事外不以細故介懷洛都築第於歸仁里任淮南時嘉禾怪石置之階廷館宇清華木竹幽邃常與詩人白居易吟詠其間無復進取之懷三年九月徵拜左僕射仍令左軍副使王元直實告身宣賜舊例留守入朝無中使賜詔例恐僧孺退讓促令赴闕僧孺不獲已入朝屬莊恪太子初薨延英中謝日語及太子乃懇陳父子君臣之義人倫大經不可輕移國本上爲之流涕是時宰輔皆僧孺僚舊未嘗造其門上頻宣召託以足疾久之上謂楊嗣復曰僧孺稱疾不任趨朝未可卽令自便四年八月復檢校司空兼平章事襄州刺史山南東道節度使加食邑至三千戶辭日賜軀散樽杓等金銀古器令中使喻之曰以卿正人賜此古器卿且少留僧孺奏曰漢南水旱之後流民待理不宜淹留再三請行方允武宗卽位就加檢校司徒會昌二年李德裕用事罷僧孺兵權徵爲太子少保累加太子少師大中初卒贈太子太師諡曰文貞僧孺少與李宗閔同門生尤爲德裕所惡會昌中宗閔棄斥不爲生還僧孺數爲德裕持撫欲加之罪但以僧孺貞方有素人望式瞻無以伺其隙德裕南遷所著窮

慈志引里俗懷子之識以斥僧孺又目爲太牢公其相憎恨如此僧孺二子蔚襲蔚字大章十五應兩經
舉太和九年復登進士第三府辟署爲從事入朝爲監察御史大初爲右補闕屢陳章疏指斥時病宣
宗嘉之曰牛氏子有父風差慰人意尋改司門員外郎出爲金州刺史入拜禮吏二郎中以祀事準禮天
官司所掌班列有恃權越職者蔚奏正之爲時權所忌左授國子博士分司東都踰月權臣罷免復徵爲
吏部郎中兼史館修撰遷左諫議大夫咸通中爲給事中延英謝日面賜金紫蔚封駿無避帝嘉之踰歲
遷戶部侍郎襲封奇章侯以公事免歲中復本官歷工禮刑三尚書咸通末檢校兵部尙書興元尹山南
西道節度使在鎮三年時中官用事急於賄賂屬徐方用兵兩中尉諷諸藩貢奉助軍蔚盡索軍府之有
三萬端匹隨表進納中官怒卽以神策將吳行魯代還及黃巢犯闕乃自京師奔遁避地山南拜章請老
以尙書左僕射致仕卒累贈太尉子循徽徽咸通八年登進士第三佐諸侯府得殿中侍御史賜緋魚入
朝爲右補闕再遷吏部員外郎乾符中選曹猥濫吏爲姦弊每歲選人四千餘員徽性貞剛特爲奏請由
是銓敘稍正能否施別物議稱之巢賊犯京師父蔚方病徽與其子自扶藍輿投竄山南閣路險狹盜賊
縱橫谷中興盜擊徽破首流血被體而捉輿不輟盜苦迫之徽拜之曰父年高疾甚不欲駭動人皆有父
宰相垂恤盜感之而止及前谷又逢前盜相告語曰此孝子也卽同舉輿延於其家以帛封瘡餽飲奉蔚

留之信宿得達梁州故吏感恩爭來奔問時僖宗已幸成都徽至行朝拜章乞歸侍疾已除諫議大夫不拜謂宰相杜讓能曰願留兄循在朝以當門戶乞侍醫藥時循爲給事中丞相許之其年鍾家艱執喪梁漢旣除以中書舍人徵未赴疾作以舍人綸制之地不可曠官請授散秩改給事中從駕還京至陳倉疾甚經年方聞宰相張潛爲招討使奏徽爲判官檢校左散騎常侍詔下鳳翔促令赴關徽謂所親曰國步方艱皇初復帑廩皆虛正賴羣臣協力同心王室而於破敗之餘圖雄霸之舉俾諸侯離心必貽後悔也以吾衰疾之年安能爲之扞難辭疾不起明年潛敗召徽爲給事中楊復恭叛歸山南李茂貞上表請自出兵糧問罪但授臣招討使奏不待報茂貞與王行瑜軍已出疆上怒其專不時可之茂貞恃强章疏不已昭宗延英召諫官宰相議可否以邪鳳皆有中人內應不敢極言相顧辭遜上情不悅徽奏曰兩朝多難茂貞實有翼衛之功惡諸楊阻兵意在嫉惡所造次者不俟命而出師也近聞兩鎮兵入界多有殺傷陛下若不處分梁漢之民盡矣須授以使名明行約束則軍中爭不畏法帝曰此言極是乃以招討之命授之及茂貞平賊自恃凌驕多撓國政命杜讓能料兵討之徽諫曰岐是國門茂貞倔强不顧禍患萬一蹉跌挫國威也不若漸以制之及師出復召徽謂之曰卿能斟酌時事岐軍烏合朕料必平卿以爲捷在何日徽對曰臣忝侍從諫諍之列所言軍國據理陳聞如破賊之期在陛下考著龜竇將帥非臣之職

也而王師果剋大臣被害徽尋改中書舍人歲中遷刑部侍郎封奇章男崔胤連結汴州惡徽言事改散騎常侍不拜換太子賓客天復初賊臣用事朝政不綱拜章請罷詔以刑部尚書致仕乃歸樊川別墅病卒贈吏部尚書襲字表齡開成二年登進士第出佐使府歷踐臺省乾符中位至劍南西川節度使黃巢之亂從幸西川拜太常卿以病求爲巴州刺史不許駕還拜吏部尚書襲王之亂避地太原卒子嶠位至尚書郎

蕭俛字思謙曾祖太師徐國公嵩開元中宰相祖華襲徐國公肅宗朝宰相父恆贈吏部尚書皆自有傳俛貞元七年進士擢第元和初復登賢良方正制科拜右拾遺遷右補闕元和六年召充翰林學士七年轉司封員外郎九年改駕部郎中知制誥內職如故坐與張仲方善仲方駁李吉甫謏議言用兵徵發之弊由吉甫而生憲宗怒貶仲方俛亦罷學士左授太僕少卿十三年皇甫鏗用事言於憲宗拜俛御史中丞俛與鏗及令狐楚同年登進士第明年鏗援楚作相二人雙薦俛於上自是顧眄日隆進階朝議郎飛騎尉襲徐國公賜緋魚袋穆宗卽位之月議命宰相令狐楚援之拜中書侍郎平章事仍賜金紫之服八月轉門下侍郎十月吐蕃寇涇原命中使以禁軍援之穆宗謂宰相曰用兵有必勝之法乎俛對曰兵者凶器戰者危事聖主不得已而用之以仁討不仁以義討不義先務招懷不爲掩襲古之用兵不斬祀不